

PRIEDI PER IL 19 D'AVREL 2020
LUVEN FLOND PITASCH DUVIN

Jesaja 40, 26-31

26 Alzei voss'egliada si viers las steilas
e mirei: Tgi che ha scaffiu ellas?

El meina neuadora lur armada tenor lur diember
e cloma ellas tuttas per num.

Pervia da sia gronda pussonza
e sia immensa forza
maunca buc ina.

27 Pertgei gis ti, Jacob, e plaidas ti, Israel:

Mia via ei tschelada al Segner

Miu dretg emporta nuot a miu Deus.

28 Has buca capiu, has buc udiu:

In Deus perpeten ei il Segner.

El ha scaffiu ils cunfins dalla tiara.

El vegn buca staunchels e vegn buca lass
nunperscrutabla ei sia enconuschientscha.

29 El dat forza al staunchel

E ferma possa al fleivel.

30 Giuvens vegnan staunchels e lass,
guerriers scarpetschan e crodan,

31 mo quels che speran el Segner

retscheivan nova forza,

alas creschan ad els sco ad tschéss.

Els cuoran e vegnan mai staunchels,
caminan e vegnan mai lass.

Cara raspada

Tschun jamnas eis ei, dapi che nossa veta e vegnida midada.

Vegnida midada dad in virus.

Ina forza jastra, remarcabla che sederasa ora nunveseivlamein, che peglia in aschia, ed in auter aschia, ed entgins peglia ella grevamein.

Nos corps vegnan confruntai cun enzatgei niev.

Nies entelleg ei dumandaus, per capir, tgei che schabegia.

Nossa cardientscha stat avon in examen.

Co mein nus entuorn cun quei invasur - gie infractur?

Co sedepurtein nus?

Tgei forzas duvrein nus per semetter encunter?

Cun dretg han nossas regenzas giudicau per aschi seriusa la situaziun, ch'ellas han intervegniu ella veta publica.

Libertads cun quellas che nus essan disai, ch'ei sigilladas en nossa veta, ein restrenschidas.

Producir, commerciar e hanlegiar ei vegniu restrenschiu.

Igl ei ina restricziun da nies entir moviment.

E perquei che tut las novitads ein novitads da corona, vegn era nies patertgar restrenschius.

En quella situaziun selai la vusch da Jesaja udir per nos legiders.

Nus seschein menar in mument da ses patratgs.

Igl ei notg.

Nus essan ordado.
Igl ei serein.

Alzei voss'egliada si viers las steilas e mirei!

Noss'egliada vegn extendida sur quei sulet tema,
che para schizun dad haver magliau en la libertad dil
schurnalisse.

Alzei voss'egliada, leu dat ei aunc outras caussas.

Tgi ha scaffiu quei?

Senza che nus stuein immediat numnar in num:
Nus vesein e sentin ina forza - ina possa che surmunta
nossa entelgientscha.

Era sche nus enconuschein plaids sco «steila» e
«tschiel».

Il diember, la vastadad il lontan surmunta nossa
capientscha.

Nus astgein exister sut quei tschiel.

El meina neuadora lur armada tenor lur diember e cloma ellas tuttas per num.

Lur armada? En in temps, nua ch'ins ha viu en mintga
tgierp celestial ina deidad, in esser divin, lu vevan nos
perdavons a risguard dalla cardientscha la curascha da
gir:

Na, igl ei mo **in**, che accumpogna nus atras la veta.

In Deus, che sa nos nums.

E tut quei ch'ins ha inaga numnau divin ei obedeivel ad
el.

Era l'armada dallas steilas.

Cheu arrivein nus cun nossa cardientscha tier in punct da legn.

Tgei eis ei cull'armada da virus, che fa gest siu til da triumf garmadi entuorn il mund?

Gl'emprem ei da gir:

La cardientscha pren serius, tgei che la scienza natirala gi.

Quei, che perscrutaders anflan ora sur dil secuntener e la derasaziun dil virus prendein nus serius.

Nus dumandein era suenter la seriusadad dallas fontaunas.

Tgi raquenta a nus tgei?

Pertgei aschia sco il virus sefa vitier, aschia paran era "fake news" da sefar vitier.

Aschidagir: Il virus el tgau.

Situaziuns da malsegirtad vegnan adina surduvradas da tscharlatans, per derasar novitads senza péz ni cantun el mund, per far tema.

Christifideivles sedattan breigia, da differenziar cuntegns serius da cuntegns, dad „Angstmacherei“ che fan tema senza raschun.

Sche la risposta dalla scienza natirala ei tedlada, resta la dumonda dalla cardientscha.

A tgei signur ni regent rendin nus omagi?

All'armada dil Coronavirus, ni a nies Deus, che para buca da saver retener quell'armada?

Has buca capiu, has buc udiu?

Nus essan el temps da Pastgas e nus seregurdein:
 Nies Deus victorisescha sut l'enzenna dil cuntrari.
 El vegn mazzaus, scumpara, vesa ora sco in sperdider, e
 nus cun el, che vevan spronza en el,
 Nus capin buca, tgei che schabegia.

In Deus perpeten ei il Segner

El ha scaffiu ils cunfins dalla tiara.

El vegn buca staunchels e vegn buca lass.

Nunperscrutabla ei sia enconuschientscha.

El tschelau sesemtga nies Deus da returnar en veta.

Cristus ei levas.

Mo dumandei buca „sco?“ Ei stat ina miracla.

El ei vegnius anavos e ha plantau veta e curascha els
 cors dils trests.

El dat forza al staunchel.

E ferma possa al fleivel.

Nossa forza ei, che nus tenin ferm nies Deus.

Era sch'el ei in curios, in miraculus.

Per tudestg havein nus il medem plaid: “wundersam”

Nus capin buc en tut el, mo el gudogna nos cors.

E tut las outras forzas, che paran aunc aschi
 smanatschontas, ein sutordinadas ad el.

**Mo quels che speran el Segner, retscheivan nova
 forza,**

alas creschan ad els sco ad tschéss.

Els cuoran e vegnan mai staunchels,

caminan e vegnan mai lass.

Jesaja muossa a nus il tschiel.

Tgei uss, sche nus pudein buca pli alzar l'egliada,

en quei onn particular 2020?

Tgei uss, sche las novitads da Corona restrenschan
nossa percepziun, che nus savein buca pli veser ed udir
enzatgei auter?

Tgi era adina che plaida cheu, el sesa denter nus. El
pren temps. El dumonda co ei va cun nus.

Pertgei gis ti, Jacob, “mia via ei tschelada Segner”?
Cheu ei il punct, nua che nus savein gir tut quei che
grevegescha e surcarga nus en nossa situaziun.

Jeu sesentel serrada en en mia habitaziun.

A mi maunca il caffè culla vischina.

A mi mauncan las tschaveras communablas e
sentupadas culla famiglias gronda.

Jeu haiel tema da pigliar il virus.

Suenter che nus vein discurriu dils quitaus, savein nus
empruar dad anflar in punct da sustegn en nus e ed
activar nies potenzial.

Sas ti buc, has ti buc udiu?

Per cletg gi, tgi era adina che discuora cun nus buca
gest: “ti stos ussa sentir quei, con fermes che nies Deus
ei”.

Quei fuss malemperneivel.

Pertgei forsa sentin nus buca la confidanza, che vegn
descretta cheu.

Tuttina eis ei impurtont, che nus vegnin pertucaj culla
confidanza.

Malgrad che nus spitgein che las mesiras vegnien
abolidas pass per pass:
Leu sto aunc esser dapli che la veta ha ensenn cun nus.

El mument vala:
Pintgas caussas survegnan muntada. In discuors sin via
ni meglier getg sur via vi fa veramein bein
Nus vegnin sill'idea da telefonar e nus survegnin
telefons.

En l'entira limitaziun negativa sentin nus era ina vart
positive.
Nus encurin il bi el contuorn e buca el lontan.

Aunc inaga la consolaziun. Forzas humanas ein
limitadas. Quei sauda vitier che forzas humanas vegnan
spussadas e lain suenter.
Umens vegnan staunchels e lass.

Il spetgar survegn ina direcziun.

Mo quels che speran el Segner retscheivan nova forza
Ei dat dapli, sin quei che nus savessen spitgar che mo
las novas cefras e las pli novas ordinaziuns e
disposiziuns.

Il Deus, ch'ei sur da nus, quel che meina neuadora las
steilas, el seporscha a nus sco finamira da spetgar e
sperar.

Buca schar pender il tgau pervia dallas novas cefras,
denton alzar il tgau ad in, ch'enconuscha il diember da
tut las steilas, il diember da nus ed era nies num.

AMEN

Il plaids da Jesaja han dau material per ina biala canzun
d'uffons.

Sas ti contas steilas claras miran giu dil tschiel ornau?
Sas cons nibels per las tiaras van catschai dal vent stemprau?
Tgi pomai sai quei decider auter che mo il Scaffider:
El persuls ha tut dumbrau, el persuls ha tut dumbrau

Sas dumbrar con bia litgivas egl uaul fan lur termagls?
Contas flurs sin praus e rivas stattan en vestgius bi gagls?
Dil Scaffider ein clamadas, creatiras tut dumbradas,
che buc ina po muncar, che buc ina po muncar.

Sas cons pigns da notg quieta dierman dulutsch en lur letgets?
Cons il di cun biala veta ein da cor cuntents e leds?
Dieus il bab, schi buntadeivel, mira giu sin tuts migeivel.
Siu affon eis era ti, siu affon eis era ti.